

Odluka NSRS zaustavlja napredak BiH ka EU

Narodnoj skupštini Republike Srpske sinoć su dati ključevi od vrata Evrope, ali ona ih je odbacila. Posljedice ovakve odluke su jasne. To znači da je BiH propustila šansu da do vremena desete godišnjice potpisivanja Daytonskog sporazuma otpočne pregovore o potpisivanju Sporazuma o stabilizaciji i pridruživanju – koji predstavljaju prvi korak za pridruživanje Evropskoj uniji.

Umjesto da se ova godišnjica obilježi kao proslava ostvarenog napretka, biće viđena kao simbol kako je jedan dio BiH zaustavio ostatak zemlje u ostvarenju napretka.

SDS, kao glavna stranka Vlade RS, kao i druge stranke koje su glasale za sva tri zaključka Narodne skupštine RS, uključujući i PDP, snose glavnu odgovornost za ovo. One su odbacile ne samo tri principa Evropske komisije o reformi policije već i cjelokupnu budućnost RS i BiH u Evropskoj uniji. Time su Srbe u BiH izolirali od njihovih susjeda u Beogradu koji su na putu da otpočnu pregovore o potpisivanju Sporazuma o stabilizaciji i pridruživanju za tri sedmice.

BiH, i RS, su mogle biti u takvoj istoj poziciji.

Vlada RS je u potpunosti bila uključena u proces reforme policije i sve sastanke u tom procesu i to od samog početka. Oni znaju da bez reforme policije nema Evrope. Pa ipak, više od godinu dana, i uprkos jasnim i ponovljenim objašnjenjima datim od strane međunarodne zajednice i Evropske komisije (EC), članovi Vlade RS su konstantno istupali sa prijedlozima koji nisu u skladu sa tri principa Evropske komisije. Evropska komisija, i države članice Evropske unije, su krajnje jasno stavile do znanja da zaključci NSRS od 30. maja nisu u skladu sa tri uslova Evropske komisije. Budući da delegacija RS ne

nudi nikakve prijedloge koji će ispuniti uslove Evropske komisije, nema osnova za nastavljajanje institucionalnih pregovora.

Sa žaljenjem konstatiramo sljedeće: međunarodna zajednica i ostale uključene bh. stranke su pravile veoma bitne ustupke delegaciji RS tokom cijelog procesa pregovaranja u istinskom nastojanju da izađu u susret njihovim bojaznima. Konačni prijedlog koji je predložen NSRS uključivao je niz ustupaka: kao što je kontinuirana uloga za MUP RS u odlukama o strategiji koje će se donositi na državnom nivou tokom sljedećih nekoliko godina, te produženi period implementacije u trajanju do 5 godina, koji je čak duži od perioda za reformu odbrane. Komesar Rehn je također jasno stavio do znanja da bi ovaj prijedlog koji je jučer prezentiran NSRS ispunio kriterije Evropske komisije.

Mi smo spremni da razgovaramo kada Vlada RS bude mogla prihvatiti ovo. Ali svim stranama mora biti veoma jasno da nema svrhe vraćati se na pregovore osim u slučaju ako Vlada RS bude spremna ispoštovati uslove Evropske komisije. Situacija ne može biti jasnija. Znaju koga treba da kontaktiraju kada budu spremni.